

Малахиа рече: «Паде Израиль и не приложит к тому възстати». Исайа же сице глаголетъ: «Кто умолен будет о тебе, Израилю, или кто приклонится к миру твоему». Глаголетъ ¹⁰ господь: «Простру руку мою и растлю тебе и к тому не възнесу тебе и град, иже дах вам, дам в поношение и в безчестие вечное». Божественый же Захария глаголетъ тако: «Глаголетъ господь богъ Израилев: се аз наведу на Израиля злаа и низложу их оружиемъ предъ врагы их, и сътворю град их в разрушение и в повесть вечную, и покажу им день погыбели, и дам их в расеание всемъ царствомъ земнымъ, и будетъ в поношение и в мерзость и в клятву въ всехъ странахъ». Божественый же Предтеча Иоанъ нарицаетъ ихъ изчадия змиина. Господь богъ нашъ Исусъ Христосъ истинный светъ, просвещая всякого человека, || рече к нимъ: «Вы отца вашего диавола есте и похоти его хощете творити».

Аще же попускаетъ господь, а не погубитъ ихъ, о семъ не дивися, таковъ бо есть обычайъ человекалюбца бога нашего: ожидаетъ убо всемъ покаанна, аще ли же не обратятся истинною, тогда примутъ сужение съ диаволомъ, прелстившимъ ихъ. Тебе же, господине, ныне время благоприятно о истинне попечении имети и немощныхъ подкрепитьи. Аще и скорбно прилучится претерпети Христа ради, занеже никто же не подвизався венець прияти, или кто спя победу ¹¹ сътвори, или кто почиваа похвалу приемъ? Ибо болезни ражаютъ славу и труды исходатайствуютъ венца. Конечъ симъ всемъ господь нашъ Исусъ Христосъ и иже тебе мзду въздасть противу твоему труду. Аминь.

¹⁰ В рукописи «глаголе».

¹¹ В рукописи «победу».